

欽定大清會典事例

欽定大清會典事例卷六百二十九

兵部

綠營處分例

海禁一

海禁。○順治十二年題准。海船除給有執照許令出洋外。若官民人等擅造兩桅以上大船。將違禁貨物出洋販往番國。並潛通海賊。同謀結聚。及為嚮導劫掠良民。或造成大船。圖利賣與番國。或將大船賃與出洋之人。分取番人貨物者。皆交刑部分別治罪。至單桅小船。准民人領給執照。於沿海近處捕魚取薪。營汛官兵不許

擾累。○康熙十一年題准。居住海島民人。概令遷移內地。以防藏聚接濟姦匪之弊。仍有在此等海島築室居住耕種者。照違禁貨物出洋例治罪。汛守官弁。照例分別議處。○二十三年題准。山東。江南。浙江。廣東各海口。除夾帶違禁貨物。照例治罪外。商民人等有欲出洋貿易者。呈明地方官。登記姓名。取具保結。給發執照。將船身烙號刊名。令守口官弁查驗。准其出入貿易。○又覆准。焰硝。硫磺。軍器。樟板等物。違禁私載出洋接濟姦匪者。照例治罪。該管汛口文武官

弁盤查不實者革職。知情賄縱者革職。提問兼轄官降四級調用。統轄官降二級留任。提督降一級留任。○四十二年議准。出洋貿易商船。許用雙桅。梁頭不得過一丈八尺。如一丈八尺梁頭。連兩披水溝。統算有三丈者。許用舵水八十人。一丈六七尺梁頭。連兩披水溝。統算有二丈七八尺者。許用舵水七十人。一丈四五尺梁頭。連兩披水溝。統算有二丈五六尺者。許用舵水六十人。若舵水越數多帶。或詭名頂替。守口官弁盤查不出者。降三級調用。藉端勒索者。降二

級調用。受賄者革職。計贓治罪。若兵有需索情弊。將該管官照衙役犯贓例議處。○又議准。漁船梁頭不得過一丈。舵水不得過二十人。取魚不許越出本省境界。欲造船者先報明地方官。取澳甲里族各長並鄰佑保結。方准成造。完日。地方官親驗。將船身烙號刊名。舵水人等。取具船戶保結。然後給照。照內將在船之人年貌籍貫。分析填明。○四十六年議准。福建省漁船桅聽其用雙用單。各省漁船止許單桅。欲出洋者將十船編為一甲。取具一船為匪。餘船並坐連。

環保結。若船主在籍而船隻出洋生事者。罪坐船主。○四十七年覆准。出洋船所帶食米。不得過五十石。如多帶出洋販賣者。照例治罪。將米入官。○五十年議准。商民漁船給發執照。係州縣專責。如營官擅給執照者。降二級調用。儻借執照為匪。將擅給執照之營官革職。○五十六年覆准。出洋船按道里遠近。人數多寡。停泊發貨日期。每人一日准帶食米一升。並帶餘米一升。以防風信阻滯。出口時。守口官弁逐一驗明放行。不許藉端需索。○又覆准。臺灣產米。不許

私運出洋販賣。至漳泉廈門等處。米少價貴。有船從臺灣帶米至該處者。准其照時價糶賣。○又覆准。商船准在沿海省分及東洋貿易外。其南洋之呂宋噶喇巴等處。不許前往。皆在南澳等地方稽查截住。令廣東水師各營盤緝。違者治罪。其外國夾板船。照舊准其貿易。地方官嚴加防範。不許生事。○又覆准。渡海人民。必由地方官給照。守口官弁查驗放行。若無照偷渡者。嚴行禁止。如有巡哨船私帶偷渡者。將該管專轄官議處。○五十九年議准。出洋商船。初造時

先報明海關監督並地方官。該地方官確訪果係殷實良民。取具澳甲里族各長並鄰佑保結。方准成造。完日地方官親驗。梁頭並無過限。舵水並無多帶。取具船戶不得租與匪人甘結。將船身烙號刊名。然後給照。照內將在船之人年貌籍貫。分析填明。及船戶攬載開放時。海關監督將原報船身丈尺驗明。取具舵水連環互結。客商必帶有資本貨物。舵水必詢有家口來由。方許在船。監督驗明之後。即將船身丈尺。客商姓名人數載貨前往某處情由及開行日期填

入船照。○六十一年覆准。外洋番國進貢。順帶貨物。願自出夫力帶京貿易者。聽如欲在彼處貿易。該督撫委廉能官監看。貿易完日。造冊報部。如貢船到岸。未曾報官盤驗。先行售賣。及內地民人為外國收買違禁貨物者。皆照例治罪。至不係進貢之船。有裝載貨物前來貿易者。照例投行納稅。聽其貿易。回權之日。不許收買違禁貨物。○又議准。商漁船被風飄至朝鮮。如領有執照者。該國王照例送回。若匪類並無執照。私自前往生事者。許該國王緝拏。照該國法審

擬咨禮部題請

欽定。令該國王於彼處完結。仍報部存案。並究明由何處出口。將失察守口官升降四級調用。該管上司降一級留任。提鎮罰俸一年。如守口官弁知情故縱者。革職提問。不揭報該管之上司。降三級調用。不題叅之提鎮。降二級調用。○雍正元年題准。出海商漁船。自船頭起至鹿耳梁頭止。大桅上截一半。各照省分油漆飾。江南用青油漆飾。白色鉤字。浙江用白油漆飾。綠色鉤字。福建用綠油漆飾。紅色鉤字。廣東用紅油漆飾。青

色鉤字。船頭兩披。刊刻某省某州縣某字某號字樣。沿海汛口及巡哨官弁。凡遇商漁船。驗係照依各本省油飾刊刻字號者。即係民船。當即放行。如無油飾刊刻字號。即係匪船。拘留究訊。

○三年奉

旨。無照民人。夾帶船內偷渡者。發覺之日。將該管督提一併議處。又議准。西洋人附居廣東澳門。共有大小二十五船。地方官編列號數。刊刻印烙。各給執照一紙。將船戶舵水及商販夷人該管頭目姓名填註照內。即以此二十五船為定額。不許

增置。若實係朽壞不堪修補。呈明地方官查驗。取具印甘各結申報督撫。准其補造。仍用原編字號。又覆准廣東漁船。梁頭不得過五尺。舵水不得過五人。又議准附居廣東澳門之西洋人。所有出洋商船。每年出口時。將照赴沿海該管營汛挂號。守口官弁。將船號人數姓名。逐一驗明。申報督撫存案。如出口夾帶違禁貨物。並將中國之人偷載出洋。守口官弁徇情疏縱者。革職。至入口之時。亦將船號人數姓名。逐一驗明。申報督撫存案。除頭目遇有事故。由該國

發來更換者。准其更換外。其無故前來者。不許夾帶入口。及容留居住。若稽查不到。將守口及地方該管各官。照失察例議處。○又覆准。福建省產米無多。往販外番船。酌定帶回米以資民食。往暹羅者。大船帶米三百石。中船帶米二百石。噶喇巴大船帶米二百五十石。中船帶米二百石。呂宋東埔寨馬辰柔佛四處。大船各帶米二百石。中船各帶米一百石。埭仔六崑安南宋厝勝丁家盧宿霧蘇祿七處。中船各帶米一百石。於入口時。將數目驗明。若有多餘。一併造報。

均聽照時價發賣。如不足數。及有偷漏情弊。照接濟姦匪例治罪。○又覆准。外洋行走之船。動經數月。鐵釘油灰。梭絲黃麻等物。准酌量攜帶。於照內填註數目。以備查驗。如有動用。同船之人。出具甘結存案。儻有藉端多帶者。照例治罪。○五年覆准。南洋諸國。准令福建商船前往貿易。○又覆准。廣東省地狹民稠。照福建例。准往南洋貿易。○又議准。山東邊海。除外來商船。各照該省執照查驗外。其登萊二府民人。前往奉天貿易。及奉天等處民人。有赴山東貿易者。入

口出口。該州縣均給執照。將客商船戶姓名貨物往販地方。一一填註。守口官弁。掛號驗照放行。若並不稽查。或有勒索擾累者。照例議處。○六年議准。出洋商船。於出口之處。將執照呈守口官弁驗明掛號。填註出口月日放行。造冊詳報督撫。該督撫於每年四月內。造冊報部。回時於入口處。守口官弁將照與船比對相符。詳報督撫銷號。該督撫於每年九月內。造冊報部。如出洋人回而船不回。大船出而小船回。及出口人多而進口人少者。該督撫嚴加訊究。果係番

欠未清。俟來年六七月間。乘風駕回。其被風飄往別省者。船戶取具彼處地方官印結。齎回呈驗。遭風覆溺者。若有餘存之人。及同行鄰船客商舵水等。即訊取確供保結。再加地方官印結詳報。均於入口冊內。聲明報部。免其訊究。儻留番清欠之船。來年仍不駕回。捏報遭風飄溺。並無彼處地方官印結。及餘存之人鄰船客商舵水甘結者。該督撫嚴查治罪。原出結地方官交部議處。○又議准。商船在各省沿海貿易者。於出口之處。將船照呈守口官弁驗明挂號。經過

之處。於要汛驗明掛號入口之處。由守口官弁
驗明。回權之日。仍從各原處覆驗掛號進口。
又覆准商船漁船。不許攜帶槍礮器械。至往販
東洋南洋之大船。原與近洋不同。准其攜帶鳥
槍。不得過八杆。腰刀不得過十把。弓箭不得過
十副。火藥不得過二十斤。洋商投行買貨。即同
牙人將應帶軍器數目。呈明海關給票照數製
造。鑒書姓名號數。完日報官點驗。填入照內。守
口官弁驗明放行。回日如有短少。即行訊究。果
係遺失。取通船甘結存案。○七年議准臺灣南

路北路一帶山口。生番熟番。分界勒石。界以外聽生番採捕。如民人越界墾地搭寮抽藤弔鹿。及私挾貨物。擅出界外者。失察之該管官降一級調用。該上司罰俸一年。若有賄縱情弊。該管官革職。計賊治罪。如三年之內。民番相安無事。將該管官紀錄一次。社甲兵丁人等。該督撫酌加獎賞。○又覆准。江南浙江兩省商民。准照福建商民往南洋貿易。其前往南洋。必經由福建。所有商船姓名數目。該督撫先期知會福建總督。轉飭守口官弁。查驗放行。回權之日。仍由福

建總督知會江浙互相稽查。○又議准福建省商船值漁期欲出海取魚者。赴地方官呈明。換領漁照。取具澳甲里族各長並鄰佑保結。同船連環互結。准其入海取魚。俟漁期過後。將漁照繳銷。仍換給商照。該地方官將換給船照緣由。彙報上司存案。如過期不歸。即行查究。永不許出海取魚。○又覆准出洋船食米。若於酌定數目之外。多帶售賣。或實係接濟姦匪。或止係圖利。查出將米入官。賣米之人。分別治罪。守口官弁。隱諱不報者。革職。如受賄故縱。革職治罪。○

八年覆准。往販東洋南洋大船。准攜帶之礮。每
船不得過二位。火藥不得過三十斤。造礮時呈
明地方官。給予印票。赴官局製造。完日。地方官
親驗。鑿鑿某縣某人姓名。某年月日製造字樣。
仍於照內註明所帶之礮輕重大小。以備海關
及守口官弁查驗。回日。繳官存庫。開船再行請
領。儻本船遭風。礮致沈失。即於所在地方官報
明。免其治罪。如其船無恙。妄稱沈失者。即行訊
究。若商船內買有外番紅銅礮。許其帶回交地
方官。給予時價。以充鼓鑄之用。○九年奉

旨。鐵器不許出洋貨賣。律有明禁。乃聞粵東出產鐵鍋。凡洋船貨賣。向來禁止。夷船出口。每船所買鐵鍋。少者百連。至二三百連不等。多者買至五百連。並有至千連者。每連約重二十斤不等。五百連約重萬斤。千連約重二萬斤。計算每年出洋之鐵。為數甚多。誠有關繫。嗣後鐵鍋應照廢鐵之例。一概嚴禁。無論漢夷商船。均不許貨賣出洋。違者照捆載廢鐵出洋之例治罪。官役通同徇縱。亦照徇縱廢鐵例議處。凡遇洋船出口。仍交與海關監督一例稽察。至於商船每日煮食之鍋。仍照舊置用。官役不得藉端勒索滋擾。儻

地方官弁視為具文奉行不力。經朕訪聞。或別經發覺。定行從重議處。各省洋船出口之處。均令一體遵行。永著為例。○又覆准。一切廢鐵。除內地販賣。聽從民便。毋庸禁止。如有將廢鐵潛出邊境。及海洋貨賣。立即拏究。照例治罪。該管官知情故縱者。革職。受賄者。革職提問。○又議准。商漁船蓬上。大書州縣船戶姓名。每字各大徑尺。藍布蓬用石灰細麵。以桐油調書。篾蓬白布蓬用濃墨書。黑油分抹字上。不許模糊縮小。○又奏准。商漁船桅披。照省分漆飾。及蓬上書姓名。原為稽查。

姦匪若官弁怠惰偷安不稽查者革職兼轄統轄官不揭報者降二級調用不行題叅之總兵官罰俸一年提督罰俸六月。○又議准商船在洋遭風落淺巡哨汛守兵丁不為救護轉搶奪財物拆毀其船以致商人斃命或未致斃命皆照例分別首從治罪在船該管官弁如同謀搶奪雖兵丁為首該員亦照為首例治罪雖不同謀但分贓者照為從例治罪實係不能約束並無通同分肥情弊者革職若遭風被淹商人救援得生兵丁因而撈取財物者坐贓治罪該管

官鈐束不嚴。降二級留任。其商人淹斃在先。見係飄沒無主船貨。因而撈搶入己不報者。亦坐贓治罪。如見船覆溺。因不許搶奪。撈取財物。阻撓不救。以致商人斃命者。阻救之人。係官革職。兵革糧。皆分別首從治罪。至沿海汛口弁兵。極力救護。遭風人船。不私取絲毫財物者。該管官據實申報。督撫提鎮記功。遇有水師千把總員缺拔補。其守備以上各官。救護船二次者。紀錄一次。儻弁兵內。因救護人船。或受傷被溺。該督撫提鎮保題。照因公差委弁兵受傷被溺例。給

予卹典。○十年議准。臺灣海外重地。文武官弁必互相稽察。若有貪酷乖張。以致起釁生事者。如係武職遊擊守備以下等官。將不揭報之副將參將降三級調用。不題叅之總兵官降二級調用。不告知督撫之文職降一級留任。如係文職同知以下等官。將不揭報之道府降三級調用。不告知督撫之武職降一級留任。○十一年議准。往販外洋商船。准用頭巾插花。並添豎桅尖。其內洋商船及漁船。不許用頭巾插花桅尖。如違例私用。守口官弁不行查報者。罰俸一年。

○十二年議准。商人置貨出洋。必在本籍地方取結給照。以防偷越及夾帶違禁貨物之弊。其中有小本商人。領照出口。迨由外番回至內地。到各處發賣貨物。並別置貨物趕回。因風信屆期。又應放權。不能奔回本籍地方請照。在福建者。准呈明廈防廳。在廣東者。呈明南海縣。在浙江者。呈明乍浦海防廳。各取具行戶船戶保結。給予執照前往。該廳縣將執照緣由。行知該商本籍地方官備案。該商回權之日。各赴請照衙門繳銷。如該船舵水客商。有在番地交易未清。

及別項事故。原給照衙門。取具同行鄰船客商。舵水甘結。移行該商本籍地方官存案。下期回日驗銷。○又議准。商船於出口之際。舵水遇有事故。該船戶就近召募。取具保結。由守口官弁批發執照。准其頂補。○又議准。民人偷渡外洋。該汛官弁拏獲十名以上者。專管官紀錄一次。兼轄官毋庸議敘。兵各賞銀二兩。二十名以上者。專管官紀錄二次。兼轄官紀錄一次。兵各賞銀四兩。三十名以上者。專管官加一級。兼轄官紀錄二次。兵各賞銀六兩。四十名以上者。專管

官加二級。兼轄官紀錄三次。兵各賞銀八兩。五十名以上者。專管官以應升之官即用。兼轄官加一級。兵各賞銀十兩。賞銀即於船戶名下追給。儻不實力稽查。致疏縱十名以上者。專管官罰俸一年。兼轄官免議。兵各責二十板。二十名以上者。專管官降一級留任。兼轄官罰俸六月。兵各責三十板。三十名以上者。專管官降二級留任。兼轄官罰俸一年。兵各責四十板。四十名以上者。專管官降三級留任。兼轄官降一級留任。兵各責四十板。革糧五十名以上者。專管官

降一級調用。兼轄官降二級留任。兵革糧。枷一月。責四十板。其降級留任之人。如能拏獲別案偷渡。按其所獲名數抵銷。若三年內稽查嚴密。汛內肅清。該督撫提鎮題請開復。○又議准。洋船偷渡民人。每在初出洋面之際。福建海船挂驗出口之時。該汛官弁。押交大擔汛。轉交浯嶼汛撥船押送東椗以外洋面。俟其乘風放洋後。方許回汛。廣東海船挂驗出口之時。該汛官弁。押交虎門協撥船押送外洋洋面。俟其乘風放洋後。方許回汛。浙江乍浦海船。出口即係大洋。

甯港海船。由鄞縣盤查。至蛟門即係大洋。普陀
海船。由定海盤查。至旗頭即係大洋。毋庸撥船
押送。

欽定大清會典事例卷六百三十

兵部

· 綠營處分例 海禁二

乾隆元年奏准漁船出口入口。守口官弁驗明船照准其出入。如盤查不實。及藉端勒索者。降二級調用。受賄者革職。○又議准沿海一應樵採及內河通海之各色小船。均報明地方官。取具澳甲鄰佑保結。編烙船號姓名給照。遇晚必停泊人家塘汛處所。儻船被賊押坐出洋。立即報官。將船號姓名移咨營汛緝究。若租船與人。

必報明本處澳甲。出結報官存案。其呈報行船
遭風者。驗明人夥有無落水受傷。必有實據。方
准銷號。其出口入口。止赴就近守口官弁挂號
稽查。不必豫定處所日期。或風信不齊。進口愆
期者。取其結狀存案。如盤查不實。及藉端勒索
者。照漁船例議處。○又覆准。米穀偷運出洋。及
在洋接濟姦匪。該管文武官弁。除通同受賄。知
情故縱。仍照律治罪外。如係失察。偷運米一百
石以上。穀二百石以上者。降一級留任。米一百
石以下。穀二百石以下者。罰俸一年。米不及十

石穀不及二十石者。罰俸六月。○二年覆准。洋船換買錢文。若數目過多。恐有販銷之弊。令守口官弁實力稽查。如有姦商圖利。多載錢出洋者。即拏治罪。○三年覆准。沿海樵採小船。每船許帶食鍋一口。所需斧斤。每人許帶一把。在船人數不得過十名。均於照內註明。出入查驗。不得越數多帶。及進口時故意缺少。○四年議准。內地民人出洋貿易。違禁買回外番人口。守口官弁稽查不力者。照外國之人私自進口不報例。降一級調用。該管上司罰俸一年。如知情故

縱者革職。賄縱者革職治罪。○又議准外洋商船頭巾插花。照舊准其備用。毋庸禁止。至沿海各省。凡係內洋商漁船隻。頭巾插花。並所豎桅尖。一例嚴行禁止。如有私帶出洋。查出照例治罪。守口官弁。照失察夾帶違禁貨物例。分別議處。其山東省出外洋商船。亦照各省之例。准其製用頭巾插花。其內洋商漁各船。一概不許製用。如有私用者。查出治罪。失察員弁。照例議處。○五年議准沿海守口官弁查驗挂號之處。不許藉端需索。故意留難。如有此等情弊。即行題

叅將守口官升降二級調用。督撫提鎮失於覺察者。罰俸一年。若兵有需索留難。將兵計贓治罪。守口官弁。照失察衙役犯贓例議處。○六年奏准。拏獲偷渡之民人。隱匿不報者。官革職。兵責四十板。革糧。賄縱者。官革職。兵革糧。皆治罪。○又奏准。拏獲偷渡之人。訊明從何處開船。將該守口官弁。照疏縱偷渡外洋例。按人數分別議處。拏獲者。照拏獲偷渡外洋例。按人數分別議敘。若弁兵因公差委。所乘船將無照之人偷載。專管官知情者。革職。提問。不知情者。革職。兼

轄統轄官不揭報題叅者。皆照不揭報劣員例議處。○又議准南洋諸國米多價賤。商船回權買米壓載。或有餘騰。或未買米載回。均聽從商便。其商船往販諸番。自宜定限。應以三年為限。逾期不歸。舵工水手人等。不許再行出洋。其外洋汎地。如有停泊洋船。查驗船照。有經閱多年者。勒令入口。交地方官查訊詳究。○七年

諭內地米穀偷載出洋。例有嚴禁。昔我

皇祖

皇考訓諭地方文武官弁。至再至三。但恐日久法弛。人

心玩忽。上年冬月巡撫陳大受奏稱。崇明一縣坐落海邊。舊例准其採買鄰近地方之米。及查考清冊。竟有指稱崇明多買。並不裝運回崇發賣者。是其私販下海。情弊顯然。著沿海地方之督撫提鎮等。轉飭文武官弁。申明禁約。實力奉行。務絕偷越之弊。儻或視為具文。仍有疏漏。經朕訪聞。必於該督撫提鎮是問。

○又覆准商船在內地沿海省分貿易者。以二年為限。二年之後始歸者。嗣後不許再行出口。往販外洋者。以三年為限。逾限不歸者。該商及舵水人等。勒還原籍。永遠不許出口。其外洋停

泊船查驗船照已逾多年者勒令入口交地方官訊究詳查。九年

諭此後臺灣武職大小各官創立莊產開墾草地永行禁止。僅有託名開墾者將本官交部嚴加議處。地畝入官該管官通同容隱並行議處。十一年奏准奉天南面均係海疆甯海復州熊岳蓋平等處地方與山東登萊兩府對峙商船不時來往凡帶有無照之人來奉天者商貨仍聽起運外其照上無名之人查出遞解回籍船戶治以夾帶私人之罪不必遞解船亦免其入官。十二年

諭各省沿海口岸設立塘汛更有哨船游巡原以防偷渡及透漏禁物之弊朕聞福建省巡查兵役惟以需索為事出入船隻俱有規例需索既遂一切不查不問該管官員所司何事乃漫無覺察一至於此嗣後務須痛革陋弊毋使仍蹈前轍至於各省俱有口岸閩省如此諒他省未必不然著各該管官員一體嚴行查察實力革除○十三年議准民人偷渡兵在外洋拏獲者仍照例分別給賞如偷渡船尚在沿海口岸兵於本管界內拏獲原係分內之事毋庸給賞若將別汛沿海口岸偷渡民人盤查擒

獲者照外洋拏獲例減半賞給但不得因有賞銀將沿海口岸不應盤查之船藉端需索滋擾○又覆准雜糧麥豆偷運出洋除接濟姦匪者與米一例科斷外若止係圖利計所運數目照二穀一米之例減等問擬至官弁受賄故縱及失察處分仍照米穀例行○十四年議准紅黃銅器及銅私販出洋貨賣者分別首從治罪銅及銅器並船均入官守口官弁知情故縱者革職受賄者革職提問失察者降一級調用○十九年議准嗣後商船實因貿易稽留在外今願

回籍。或本身已故。遺留妻妾子女。願回籍者。均准其附船回籍。令船戶出具保結。於進口時報明該管官。令歸本籍安插。攜回貲財。地方官不得藉端需索。至無賴之徒。原係偷渡番國。潛住多年。充當甲必丹。供番人役使。及本無資本。流落番地。哄誘外洋婦女。娶妻生子。迨至無以為生。復圖就食內地。以肆招搖誘騙之計者。仍照例嚴行稽查。該督撫隨時酌量辦理。○又議准嗣後出洋貿易者。無論年分久近。概准回籍。若本身已故。遺留妻妾子女。亦准回籍。責成帶回。

之船戶。出具保結存案。仍令該督撫於沿海口岸地方。出示明白曉諭。令其不必遲迴觀望。其攜回貲財。有不肖官役藉端擾累需索者。卽嚴行叅處。○二十四年覆准江浙等省絲價日昂。以該處地方濱海。不無私販出洋之弊。令江浙各省督撫。轉飭濱海地方文武各官嚴行查禁。儻有違例出洋。每絲一百斤。發邊衛充軍。不及百斤者。杖一百。徒三年。不及十斤者。枷號一月。杖一百。為從。及船戶知情不首告者。各減一等。船隻貨物俱入官。其失察之汛口文武各官。照

失察米石出洋之例分別議處各該省督撫每
於年終將有無挈獲姦商私販出洋之案專摺
奏

聞○二十五年奏准漁船原止採捕魚鮮非比經商
貿易向無紬緞皮張以及遠方貨物即或遇有
帶回亦應令赴置貨之地方汛口驗明給單以
便沿海游巡官兵及守口員弁查驗如單外另
帶多貨即移縣查明來歷儻沿海哨船及汛員
盤查不實或受賄徇縱一經發覺照例叅處○
又奏准嗣後福建省商漁船帆檣編號字迹不

必拘定顏色。如帆檣本色青黑者。即書粉字。如帆檣黃白色者。即書黑字。務依船照原編字號。書福建省某府某號某商漁船戶字樣於船檣兩披大書深刻。每字長闊一尺。帆上每字長闊二尺。漆以黑白顏色。飾以桐油。沿海汛口驗有油飾字號者。即係民船。准其放行。如無油飾字號及帆檣雖有字號而與船照不符者。立即根究緣由。如係賊船。即行擒捕解報。毋使免脫。又奏准各省漁船赴縣領照及商船改換漁照時。先將船主取具族鄰澳甲保結。然後令船主

慎雇駕船舵水。開具年貌籍貫。出具各舵水不
敢為匪甘結。送縣覈明。開列入照。並取十船連
環互結存案。於春冬兩汛出口之前。移知各汛
口員弁。查驗放行。如年貌籍貫不符。即行嚴拏
究訊。儻一船為匪。餘船連坐。餘船能將為匪船
戶首捕到官者。免罪。如船主及原保結之澳甲
不早首報者。一併嚴處。其有將船給予伯叔弟
兄子姪親友代駕出海者。取代駕出海之人族
鄰甘結。船主赴地方官呈明立案。○又奏准守
口員弁。拏獲無照偷渡民人。查明本籍。解回一

名至十名者。將本籍地方官罰俸一年。十名以上。降一級留任。二十名以上。降一級調用。○二十六年奏准。內地民人無照偷渡臺灣者。該地方官拏獲人犯。詳報該總督提督。訊明由何處出口入口。一名至九名者。將守口員弁罰俸一年。十名以上。降一級留任。二十名以上。降一級調用。其兵目澳保在本管汛地拏獲者。毋庸給賞。如在洋面拏獲偷渡人犯十名以上。同船戶客頭並獲者。賞銀四兩。每十名以上照數遞加。如偷渡船隻尚未出洋。別汛兵目澳保盤獲者。

減半賞給。所賞銀兩。即令地方官先行墊給。俟
定案後。於偷渡船隻變價充公銀內給還。守口
員弁。拏獲一起。准其記功一次。註冊。積至十次
者。查其平日居官果屬才優。即量予拔擢。若非
偷渡之人。而員弁兵役敢於妄拏。圖功邀賞者。
一經審出。即行嚴叅。從重治罪。○又奏准廈門
為渡臺之總路。而臺屬淡水廳及臺灣鳳山諸
羅。今義彰化四縣所轄各小港。均為進臺咽喉。
拏獲偷渡人犯。究明由何處出口入口。將失察
縱放出入之口岸員弁。一併嚴行叅處。○二十

九年奏准直隸山東江南浙江福建廣東等省
民人許令海上貿易捕漁各於沿海州縣給領
照票填明籍貫年貌係往何處貿易於出口入
口之時呈明守口官查驗○三十年議准海關
口岸凡一切例換照票務須查驗人數登填號
簿鈐蓋印戳方准放行進口時稽查諸事並責
成該委員吏役兼司查辦如有人照不符船貨
互異即送地方官審究如失於查察致匪船濫
出濫入審明係由何處口岸有委員者將該委
員照盤查不實例降二級調用無委員者即將

該吏役責革枷號一月。並將失察該管官照失於查察例罰俸一年。如關口員役藉端需索。仍分別叅奏議處。照例治罪。○又

諭前因內地絲斤紬緞等物價值漸昂。經御史先後條奏。請定出洋之禁。以裕民用。乃行之日久。內地絲價仍未見減。且有更貴者。可見生齒繁衍。取多用宏。非盡闕出洋之故。蓋緣出洋絲斤。本係土絲及二三蠶粗糙之絲。非腹地紬緞必需精好物料可比。徒立出洋之禁。則江浙所產粗絲轉不得利。是無益於外洋。而更有損於民計。又何如照舊弛禁。以天下之物供

天下之用。尤為通商便民乎。況所產粗絲。既不准出洋。勢不得不充雜於頭蠶好絲之內。一體售賣。與民間組織。尤多未便。且英吉利噶喇巴等國。先後以織絨不供。懇請賞給貨買。俱已特旨准其酌量配用。是外洋諸國。取給於蠶絲者。正復不少。亦宜一視同仁。曲為體恤。所有出洋絲斤。即著弛禁。其各省情形。或微有不同。應作何酌定章程。及設法稽查之處。該部詳細妥議具奏。欽此。遵

旨議定。採銅商船出洋。准其照例配帶紬緞二三蠶土絲。其餘商船。止准照額攜帶二三蠶土絲出洋。

貿易如有違例多帶及私販頭蠶湖絲出洋。該
汛口文武各官。知情故縱者。革職。賄縱者。革職。
提問。如失察偷帶一百斤以上者。降一級留任。
一百斤以下者。罰俸一年。不及十斤者。罰俸六
月。○又奏准。海船裝載貨物。接渡人口。汛口官
不行查禁者。罰俸一年。○又議准。嗣後除商船
仍遵舊例。將在船舵水人等並填給照外。其漁
船止將船主年貌姓名籍貫及作何生業開填
給照。將船甲字號於大小桅蓬及船旁大書深
刻。仍於照後多留餘紙。俟出口時。即責成守口

員弁。將該漁船前往何處。並在船舵水年貌的
實姓名籍貫。逐一查填入照。鈐蓋印信。並將所
填人數。登註號簿。准其出口入口。如查填及盤
查不實。降二級調用。並責成沿海關口委員。兼
司查辦。如失於查察。致匪船濫出濫入。降二級
調用。受賄者革職。計贓論罪。若船主在籍而船
隻出洋生事。惟船主是問。○三十四年

諭。向來硫磺出入海口。俱有例禁。原因磺斤係火藥所
需。自不便令其私販。若姦商以內地硫磺偷載出洋。
或外來洋船私買內地硫磺載歸者。必當實力盤詰。

治罪。乃定例於洋船進口時。亦不許其私帶。殊屬無謂。海外硫磺運至內地。並無干礙。遇有壓艙所帶。自可隨時收買備用。於軍資亦屬有益。何必於洋船初來。多此一番詰禁乎。嗣後惟於海船出口時。切實稽查。不許私帶硫磺。以防偷漏之弊。違者照例究治。其各省洋船入口。禁止壓帶硫磺之例。概行停止。著為例。○三十九年奏准江南小羊山地方。如有赴山傭工貿易者。地方官給予印票。守口員弁稽查驗放。仍令巡洋及守口員弁嚴行稽查。如有無照民人偷漏赴山者。將疏漏之守口員弁。分別叅

處。○四十九年奏准山東民人私往奉天守口
武弁私縱出口。降二級調用。其在洋巡哨武職
失察流民私行渡海者。照失察偷渡無照民人
例議處。○又奏准臺灣流寓民人情願回籍者。
概免給照。准其自赴鹿耳門總口。將姓名年貌
在臺灣在籍住址。告知船戶。開列總單。由船戶
持交口岸員弁驗截。挂號隨時放行。其南北一
帶口岸。不許內地船隻往來之處。仍照舊例嚴
禁不許私越。○又奏准內地民人往臺灣者。該
地方官給予照票。由廈門盤驗出口。其無照偷

渡者。嚴行禁止。若拏獲偷渡之人。詳報該總督提督。訊係逸犯逃遣。問明沿海陸路在何處進口。何處藏匿。如知情賣放窩隱者。俱革職治罪外。其失察進口員弁。降二級調用。失察藏匿地方員弁。降一級調用。如失察無照民人眷屬偷渡過臺者。降二級調用。失察隻身民人偷渡者。降一級調用。徇隱不報者。革職。該地方官能盤獲逸犯逃遣。每一名准予紀錄二次。拏獲攜帶妻子脫逃者。每一起准予加一級。其兵目澳保能將偷渡各項人犯在洋拏獲。訊明屬實。即將

船隻貨物賞給兵丁。以示獎勵。其有照商船。因風飄泊到岸者。驗明牌照。立即放行。如兵役藉端需索。將該管官降二級調用。兼轄官降一級調用。儻有積慣船戶客頭。在於內地沿海小港攬載圖利。致姦民私越出洋。地方官能拏獲者。即照拏獲逸犯逃遣之例議敘。如不實力查拏。照偷渡之例查議。至官兵因公差委。將所乘船隻偷渡無照人等。專管官知情者。革職提問。不知情者。革職。兼轄官不行揭報。均降一級調用。總兵降一級留任。提督不行題參。罰俸一

年。總督不行題。叅交吏部察議。○五十四年議。准各處海島。惟有於閩省漳泉各地盜犯出沒之所。設法禁止。嚴行稽查。飭令該地方官於給票時。查明人數。並取具地鄰甘結。方許給票。俟回船繳照時。儻有人數短少。年貌不符者。若係病故淹斃。即令同船之人。出具切實甘結。其無故不回。准令地鄰出首。將來盜案破時。若有同票之人在內。即將同船出結者。及原出甘結。又不稟首之地鄰。一併分別治罪。至船隻出口時。務令各弁兵按照查驗如所載之人。較照上人。

數浮多。即將船隻扣留。移交地方官查明嚴辦。如守口弁兵不實力稽查。甚或私行賣放。一經發覺。務須審明該犯於何年月日在何處口岸偷漏出口。即將該弁兵治罪。並將不行覺察之上司從重議處。該管上司自行查出者免議。其沿海各省給予票照及口岸稽查俱照此辦理。

○又奉

旨。沿海小港查禁既嚴。凡有搭載前往臺灣民人。非由正口。無從徑渡。恐不特胥吏兵役等從中多索錢文。即守口文武員弁亦難保無通同染指。是私渡之弊。

或可禁絕而勒捐賣放之端即由此起總在該督撫及臺灣鎮道等督飭守口文武員弁實力稽查隨時嚴密若查出胥吏兵役人等婪索私放即行嚴辦示懲不得視為具文久而生懈自此次立定章程之後再有多索搭載船租飯食銀兩故意刁難及得贓放行私越海口諸弊惟該督撫及鎮道等是問不僅將海口文武員弁從重治罪已也○五十七年奏准奉天各屬海岸河口流寓閩人及本地旗民人等領票駕駛船隻內有長自二丈五尺至四五丈者寬自六尺六寸至一丈二尺五寸者有單桅

艙蓋蒙板者。向係船戶自行修造。並無定制。是以長寬不一。今以三年為限。令其一律改造。量為收小。以三丈二尺為限。止准安用單桅。不蓋蒙板。僅於沿海口岸駕駛。不能駕駛入洋。而於漁期風信。亦無關礙。如有不遵定式改造者。照違制例治罪。枷號示衆。仍飭各處照例火烙印號。嚴飭守口員弁實力稽查。毋至怠玩。並嚴禁兵役人等。不得藉端需索滋擾。儻有情弊。即行查叅。○五十八年奏准。外洋商船人等。如有在外國置買礮位防禦盜賊者。進口之時。即開明

銅鐵礮位斤重數目。告知守口員弁。前赴有司衙門呈繳。地方官稱驗輕重。酌給價值。收存局庫。由督撫咨部查覈。其中有可備用者。撥給礮位較少之營分。以供操防。仍由督撫衙門於年底將一年內商船進口有無呈繳礮位之處。彙報戶兵二部。以備稽查。儻商船不即呈繳。一經查出。即照私藏軍器律治罪。如不攜帶進口。拋棄沙灘藏匿者。查實亦照違令律治罪。地方官失於查繳。降一級調用。守口員弁查出礮位。不即令其呈繳者。革職。○五十九年奏准。沿海有

底無蓋撥船一體報官。驗烙編號給照。青成守口員弁將該船舵水年貌姓名查填入照。鈐蓋印戳登號。准其出口入口。如盤查不實。及兵役藉端勒捐者。均降二級調用。○嘉慶四年奏准奉天回權之江浙商船。按海道遠近。人數多寡。照各省商船出口之例。每人每日帶食米一升之外。准帶餘米一升。以防風信阻滯。其米石雜糧一概嚴行禁止。毋許多帶私販出洋。仍於南船回權時。先令查卡官兵留心查訪。不使各行戶暗行賣給。並令海口旗民地方官。不時嚴密

稽查毋使偷漏。若有多帶米穀以及麥豆雜糧。汎口員弁隱匿不報者。革職。賄縱者。革職。提問。如失察偷運米一百石以上。穀麥豆雜糧二百石以上者。降一級留任。米一百石以下。穀麥豆雜糧二百石以下者。罰俸一年。米不及十石。穀麥豆雜糧不及二十石者。罰俸六月。○又奏准商民領票。該管各官盤詰明確。取具保結備查。儻有乘間冒領。濫行給發。或辦票書役及驗票坐卡官兵多方抑勒。藉端需索。一經發覺。均從重究治。失察之該管官降二級調用。並於緊要

海口派員專司稽查。儻有姦匪從該處偷渡。將派出之員降一級調用。○又奏准奉天洋面往來商船。令其先赴旅順口水師營挂號點驗。人數姓名年貌箕斗相符。即於原票內黏貼某年月日驗過印花。發交該船持往貿易。海口投驗。如到口商船驗無水師營印花字樣。不准入口卸貨。該水師協領等時加查察。如有留難勒索情弊。一經發覺。即照失察給發印票藉端勒索之例辦理。○五年

諭。朕聞閩省漳泉地方營汛兵弁。平時於汛地漫不稽

查。儻遇有緝捕盜匪。輒向地方官需索供給費用。甚或有不法兵弁。私通巨盜。得受賄賂。反為容隱藏匿。以致緝捕徒勞。案懸不結。海洋地方所設營汛兵丁。原以資捕盜之用。今不但不實力查拏。而轉受盜賊為其通信。並聞此等惡習。不獨漳泉為然。即沿海各省分營兵等。亦多有勾通洋匪。利其贓賄。名為海倖之事。頂兇承認。以致真盜漏網。似此玩法養姦。何以綏靖海疆。肅清洋面。特此通諭沿海省分各督撫及提鎮等。務須一體實心查察。嚴行飭禁。儻有前項不法兵弁。即當據實覈辦。按律懲治。毋得視為具文。仍

致有名無實。各干重譴。○又

諭。向來沿海地方。打造渡船。例應呈明州縣。查取澳甲人等保結。並非為匪之人。方許成造。至造完時。仍須報明地方官驗明印烙字號。發給執照。出口時責成守口員弁稽查。定例本屬周詳。如果地方州縣及守口員弁恪遵成例。實力奉行。則船隻無由私造私渡。盜風何難漸息。乃日久廢弛。地方官不肯認真查辦。而不肖員弁吏胥等。甚或利其厚賄。明知故縱。以致劫案頻聞。督撫等又以失察私造偷渡處分較重。不無迴護。止將盜犯按律究治。而置私造偷渡處所之

員弁於不問。似此疏縱懈怠。洋面何能肅清。嗣後沿海各督撫。務須督飭地方州縣及守口將弁。遵照定例。實力嚴察。毋得仍前疏懈。聽其私造渡船。如遇緝獲洋盜。務將船隻係由何處成造。何員驗照放行。有無代運物件之人。及知情故縱。收受陋規情弊。隨摺聲明附參。以憑查辦。儻經此番申明例禁訓飭之後。仍復因循舊習。必將該督撫等一併議處。以示懲儆。

○六年奏准各省海島除例應封禁者不許民人漁戶紮搭寮棚居住採捕外。其居住多年。不使驅逐之海島邨墟及漁戶出洋採捕暫在海

島搭寮棲止者。責令沿海巡洋員弁。實力稽查。毋致勾藏為匪。儻不嚴加稽查。致有勾引洋盜潛匿者。將沿海巡洋各員降三級調用。提督總兵降一級留任。如沿海巡洋各員知情賄縱者。革職提問。提督總兵降一級調用。○又奏准山東浙江兩省海島居民。除不許增添房屋外。其現住居民。令沿海各州縣並守口員弁。實力巡查。並責成該管鎮道。於出洋之時。嚴密查察。毋使稍有容留。仍於年底查明。有無增添。專摺具奏。○又奏准江南省小羊山地方。如有無照民

人偷漏赴山者。守口官照無照民人出口例。一二名者。罰俸一年。三名以上。降一級留任。五名以上。降一級調用。十名以上。降三級調用。巡山員弁。亦照此例議處。○又奏准臺灣南北一帶口岸。如有私越之人。將不行查禁之口岸員弁。罰俸一年。○九年

諭。前據裘行簡奏。請仍禁商船配帶礮械出洋。降旨諭令玉德等體察情形。詳議具奏。茲據奏稱。往返外夷之大洋船。該商等資本重大。應仍准其照例。每船攜帶礮位。火藥。鳥槍。腰刀。弓箭等項。不得逾例多帶。其

在內地南北兩洋貿易商船一概不准配帶礮械等語。外洋商販船隻。貨重道遠。若不准令配帶礮械。設中途遇盜。不足以資防禦。然准令配帶。漫無稽覈。恐出洋以後。盜匪乘機劫奪。轉致藉寇兵而齎盜糧。並恐姦商牟利。以之濟匪。亦所不免。嗣後除內洋船隻不准配帶外。其外洋商船。著照所議。准其按照舊例。攜帶礮位器械等件。不得有逾定額。仍著於船隻出洋時。飭令海口員弁。將攜帶礮械數目驗明。並無多帶。填給執照放行。俟該商進口時。仍將原領執照送官查驗。並令該商將在洋曾否禦盜。據實呈明。儻礮

械或有短缺。即令將因何失落緣由。詳細聲明。一一登記。以備稽考。如有捏報情事。別經發覺。即將該商按例懲治。如此立定章程。自可不致滋弊。該督撫當嚴飭海口員弁。實力奉行。毋得縱容吏胥。啟勒索訛詐之端為要。○十二年議定。商漁船隻。如將米穀麥豆。及一切應用物件。接濟姦匪者。後經發覺。無論石數多寡。將失察之守口官弁。降三級調用。如不經由海口。從沿海偷運接濟者。將守口官弁並巡海武職。均降二級留任。○十四年

諭。米石出洋。例禁綦嚴。節次降旨。諭令各督撫等。於沿

海口岸。實力稽查。以杜偷漏。乃積習因循。仍不免視為具文。即如浙江省本年並無水旱偏災。所產米穀。自足供閭閻粒食。市價亦應平賤。乃甚為昂貴。自係入市者少。出海者多。以致民食不能充裕。可見地方官平日嚴斷接濟。竟屬紙上空談。浙省如此。他省可知。試思各口岸。如果食米不放出洋。則盜匪日形困乏。何以現在浙閩粵三省盜船尚多。猶煩兵力勦捕。且各衙門不肖胥吏兵役。為之護庇。通同濟匪。得受陋規。甚至有食海俸名目。而各海關所用之人。又多係官親長隨。牟私翫法。其縱容包庇者。正復不少。不

可不嚴行飭禁。用杜弊源。著各該督撫及管理海關大員一體嚴密留心。實力查察。將前項弊端。剔除淨盡。務使盜源盡絕。民食日充。以期海洋甯謐。地方豐裕。設經此次嚴諭之後。陽奉陰違。仍致偷漏。朕惟執法從事。恐該督撫等不能當此重咎也。○又定。往販

外番船隻。各按船之大小。地方產米之多寡。帶米回內地。暹羅大船帶米三百石。中船帶米二百石。噶喇吧大船帶米二百五十石。中船帶米二百石。呂宋東埔塞烏辰柔佛四處大船各帶米二百石。中船各帶米一百石。埔仔六崑越南

宋牾勝丁家盧宿霧蘇祿七處中船各帶米一百石。於入口時將米石數目確查。除米石多餘一併造報查覈外。如米石不足原數。即嚴訊偷漏情由。照接濟外洋例治罪。○又定商漁船隻各按海道遠近人數多寡。每人每日帶食米一升之外。並帶餘米一升。以防風信阻滯。若有多帶米穀。以及麥豆雜糧。即係偷運。汎口員弁隱匿不報者。革職。賄縱者。革職。提問如並無隱匿賄縱情弊。止於失察者。按米穀多寡分別議處。偷運米一百石以上。穀麥豆雜糧二百石以上。

者。降一級留任。米一百石以下。穀麥豆雜糧二百石以下者。罰俸一年。米不及十石。穀麥豆雜糧不及二十石者。罰俸六月。○二十二年

諭。蔣攸銛奏請嚴禁茶葉海運一摺。閩皖商人販運武夷松蘿茶葉。赴粵省銷售。向由內河行走。自嘉慶十八年。漸由海道販運。近則日益增多。洋面遼闊。漫無稽查。難保不夾帶違禁貨物。私行售賣。從前該二省巡撫並不查禁。殊屬疏懈。念其事屬已往。姑免深究。嗣後著福建安徽及經由入粵之浙江三省巡撫嚴飭所屬。廣為出示曉諭。所有販茶赴粵之商人。俱仍

照舊例。令由內河過嶺行走。永禁出洋販運。儻有違禁私出海口者。一經拏獲。將該商人治罪。並將茶葉入官。若不實力禁止。仍聽私運出洋。別經發覺。查明係由何處海口偷漏。除將守口員弁嚴叅外。並將該巡撫懲處不貸。漏稅事小。通夷事大。不可不實心實力。杜絕弊端也。○道光元年

諭。孫玉庭等奏查議海關茶船出口情形。仍請照例納稅放行一摺。江省江海關向准茶葉出口。運往北省銷售。嗣因防其載往閩廣。禁止販運。上年經該撫奏請弛禁。而給事中孫世昌又以事多流弊。請仍飭禁。

茲據該督等詳查江海關出口茶船與閩廣浙省之船。可以利涉深洋者不同。舵水人等。又不能諳習南洋沙綫。勢難偷越。自係實在情形。著照舊例。凡北赴山東天津奉天等處茶船。仍准其納稅放行。其向由內河行走輸稅者。著照舊禁止出洋。不容紊越。該督等即飭知管關道員。認真稽查。凡遇商販出口船隻。查明給予關牌稅單。行知所往口岸。覈實查驗。如有攜帶違禁貨物偷漏出洋之事。即行截拏治罪。若守口員弁私行縱放。一併嚴叅懲辦。毋得視為具文。

二年

諭御史黃中模奏請嚴禁海洋偷漏銀兩一摺。所奏是定例廣東洋商與夷人交易止用貨物收買轉貿不准用銀立法甚為周備。近因民間喜用洋錢洋商用銀向其收買致與江浙等省茶客交易作價甚高。並或用銀收買洋貨實屬違例病民。不可不嚴行查禁。著廣東督撫暨海關監督派委員弁認真巡查出口洋船不准偷漏銀兩。仍不時查察。如有縱放之員即行叅革治罪。至洋商與外夷勾通販賣鴉片煙重為風俗之害。皆由海關利其重稅隱忍不發以致流傳甚廣。著該督撫密訪海關監督有無收受黑煙重稅。

據實奏聞。並通飭各省關隘一體嚴密查拏。如係何處拏獲。即應究明於何處行走。所有各關縱放員弁。即叅辦示懲。儻該督撫訪查不力。或瞻徇不奏。別經發覺。立即加之懲處。務期洋船出入積弊革除。以清關隘而裕民生。○三年

諭。閩省濱臨大海。幅員遼闊。禁姦詰匪。稽查宜周。至晉江惠安同安各縣漁船。偶因採捕乏食。逢船劫搶。舟師在洋巡緝。莫辨其為漁為盜。未能即時弋獲。嗣後著飭令沿海各縣。將各澳商漁船隻。於該船頭尾兩披印烙縣分甲號。漁戶姓名。並在風篷兩面書寫大

字。以便易於識認。仍嚴飭汛口員弁。確加查驗。毋許偷放。庶期洋面肅清。○十三年

諭

程祖洛奏福建金門廈門一帶沿海姦民有私造小船多裝划槳一名白底舳一名草鳥船藏有礮位軍械沿海伺劫販運違禁貨物其疾如飛並有闖入粵浙洋面之事。該督訪知同安縣屬之潘塗等鄉素為賊巢。即函致提臣陳化成並密行興泉永道周凱督飭水陸文武官將剋期搗穴四面兜拏。該匪等望見官兵早已逃逸。它起船隻鐵礮火藥鉛子烏槍藤牌等件。獲犯陳園等三名。又在官浚鄉起獲匪船擡礮

等件。尚有柏頭等鄉。亦為匪數等語。該匪等膽敢私藏礮位軍火。窩頓海濱。駕船伺劫。實屬罪不容誅。現在巢穴雖已搗毀。起獲匪船。共有數十隻。而匪犯止獲三名。恐柏頭鄉等處。尚有匪類餘船。另行窩頓。互相勾結情事。著該督即行知照該巡撫提督。飛飭該鎮道。並通行沿海各營縣。分咨粵浙兩省。一體實力堵拏。凡屬沿海島嶼。責令水師營將。按處揆尋。迅速追捕。務將人船並獲。不使一名漏網。一船藏匿。陳化成統轄水師。尤屬責無旁貸。儻捕治不力。獲犯仍屬寥寥。竄往浙粵等省。別經拏獲。惟該督等是問。懍之。

慎之。其匪犯陳團等。著卽飭臬司提省嚴究。根追夥黨。窩家姓名。人數。船隻。有無。窩藏另處。及礮位。軍火。來歷。務得確情。嚴行審辦。員弁中如實有奮勇出力。准酌量保舉。不得冒濫。儻有玩忽疏縱。卽查明指名。嚴叅。毋稍徇隱。○十七年

諭御史朱成烈奏銀價昂貴。流弊日深。請飭查辦一摺。所奏甚是。近來錢價日賤。自係紋銀不足所致。推原其故。固由於風俗奢侈。耗於內地。而洋煙一物。貽害尤甚。耗銀尤多。若如所奏廣東海口。每歲出銀至三千餘萬。福建浙江江蘇各海口。出銀不下千萬。天津

海口出銀亦二千餘萬。一入外夷。不與中國流通。又何怪銀之日短。錢之日賤也。前據鄧廷楨奏。掣出洋紋銀業有旨。將出力各員弁量加鼓勵。並准其將所獲之銀全數充賞。惟所掣之數尚不及百分之一。且此等姦民情變百出。難保不因廣東查掣甚緊。遂暗於浙閩諸處交通。巧為偷漏。是一處之控掣不足戢衆姦之偷越。著直隸山東江蘇浙江福建廣東各省督撫並海口各監督嚴飭所屬文武員弁統於沿海要隘處所隨時隨地認真稽查。遇有出洋快蟹等船務當實力巡查。儻敢裝載紋銀妄冀偷漏出洋立

即設法截拏。按律懲辦。毋稍輕縱。除將按獲銀兩全數分別充賞外。並著查明實在出力各員弁。據實保奏。請旨鼓勵。如有疏縱。亦即嚴參懲辦。○又

諭。昨因沿海各口岸紋銀出洋。於國計民生。關係匪細。已降旨嚴飭沿海各督撫認真查辦。該督撫等均受朕厚恩。自必共矢忠勤。力加整頓。但思錮習已久。非破格示以勸懲。驟難挽回。嗣後如該督撫等仍視為具文。並不實力查辦。必當從嚴懲處。其沿海文武員弁。巡緝不力。甚至書役包庇姦民。勾串仍有偷漏。即著該督撫嚴參加等治罪。如海口文武員弁。果能實

力堵緝或連獲數起。或破除巨案。即著該督撫據實保奏。朕必施恩破格升用。以示獎勵。自此次諄諭之後。該督撫等其各竭誠體國。務絕弊源。勉副朕力挽頽風至意。○二十一年

諭據訥爾經額查明閩廣每年到津洋船水手約計萬餘人。其實駕船力作者。每船不過二十餘人。亟應覈實稽查。以防冒充滋弊。著顏伯燾吳文鎔祁墳怡良嚴定章程。嗣後洋船北來。雇募水手。大號船不得過四十名。中號船不得過三十名。責成船戶。召募有室家之良民。連環保結。呈明該管州縣點驗。將姓名年

貌住址詳細填註照內其攜帶米糧每船止准六十石以供往還食用如有溢餘治以違令之罪並於駛進天津口時飭令報明天津鎮道詳加查驗如有不符者即令嚴辦似此防範周密庶漢姦不至涸迹而夷匪亦斷絕接濟海面漸就肅清矣○又

諭祁墳等奏嚴定商船駛赴天津等處章程一摺閩廣兩省商船販運貨物駛往天津各處貿易固屬例所不禁惟現當海氛不靖之時稽查稍有未周沿海姦徒因而涸迹或接濟逆匪水米或夾帶違禁貨物均難保其必無著通飭沿海各督撫轉飭海口文武員

弁於商船出口入口時。嚴密稽查。如有前項情弊。立即從重懲辦。務使漢姦無從溷迹。洋面日就肅清。儻查有稽查不嚴。及得規縱庇藉端訛詐情事。即著嚴行叅究。毋稍姑容。○咸豐五年

諭。怡良等奏請申明定例。嚴飭沿海地方。不准私船出海等語。廣東潮州等府。人民繁庶。素性獷悍。其失業游民。每多覓食外省。千百成羣。近年以來。以充當潮勇為名。紛紛航海。由乍浦上海等處登岸。其中良莠不齊。往往聚眾滋事。本年蘇州地方。即有搶奪行李之案。雖將該犯馬泳風等拏獲正法。而現在寄食游

民尚復不少。著該督等嚴飭地方官。查明此項廣勇。內有並非官雇。不受約束。或私販違禁貨物。不安本分者。責成地方各官。督同會館董事。清查懲辦。並著沿海督撫各飭所屬。於海船出洋時。務須悉遵舊例。給予執照。將在船商民年貌籍貫註明。如有人照不符。及照外夾帶。即行查拏治罪。並不准私造船隻。渡載人口貨物。責成守口員弁。挂號驗照。如有無照人民。私自渡海者。除將偷渡人船照例辦理外。並將失察私造船隻之地方官。查驗不力之守口員弁。嚴叅懲辦。得賄故縱者。從重治罪。